

四庫全書

集部

欽定四庫全書

集部
穀齋集卷五

詳校官檢討_臣羅國俊

中書_臣劉源溥覆勘

覆校官編修_臣汪鏞

校對官助教_臣蔡鎮

謄錄監生_臣朱鎮

欽定四庫全書卷

穀齋集卷四

明 王洪 撰

七言古詩

湖上行

湖中昨夜春水生
湖頭嗷嗷鴻鴈鳴
人家遠近湖上住
有水可魚田可耕
去年種禾湖水北
一家大小多得食
今年種麥曾賽神
一畝占收三兩石
門臨官路人往來
無事莫教門早開
牛羊鵝鴨散平野
日暮不收常自回

大兒已長當門戶小兒十歲能搖櫓婦人終日坐篷窻
補却魚網縫衣裳衣食寧論厚與薄人生無如生處
樂

夜過呂梁洪

大河西來走長洪建水直下青雲中巨石扼之勢轉雄
驚雷噴雪入半空跳波倒射天迴風劍戟下擁河伯宮
恠靈百出鰲與蟲睚眦不可衝一髮失手沒汝蹤
蹇予掛席來自東修繩掣空亘長虹忽若快鶻凌高峯

俯弄皓月紛玲瓏放歌落水驚魚龍餘響杳逐南飛鴻
人生沿洄不可窮昔雄其誰楚重瞳祇今斷石霜飛蓬
便須一飲三百鍾醉看斗杓卧孤篷回首海日光瞳矐

羯鼓歌

開元厭聽南風琴宮中別制龜茲音檀板驟擊碧雲外
白雨亂落青山陰一曲山香猶未了萬紫千紅競春曉
臨軒大笑稱天公幹旋造化須臾中魯山花苑那有此
歲歲懽娛殊未已誰知忽作秋風高渭水一夕生波濤

金鈴琅琅雨聲急
回首劍門歸未得
春風滿路紅槿開
却憶花奴淚沾臆
乃知自古戒鄭聲
不獨顏色能傾城

題陳所翁畫十四龍圖

古人畫龍誰最工
葉公以來稱所翁
興來寫此數尺紙
六合黯淡雲烟中
卷舒隱躍各有態
變化倏忽那能窮
深蟠雲氣入玄化
倒吸海水騰蒼穹
半空霹靂電飛赤
五色閃爍珠流紅
崇朝一雨遍下土
坐見四海歌年豐
吁嗟神妙有如此
筆力所極迴天功
明窓展卷一披玩

白晝颯颯來陰風崢嶸頭角露恍惚海霧噴薄浮空濛
我嘗侍從隨東封六龍扈駕羣神從綵雲春浮若木外
紅日曉上扶桑東岳祗川后共警蹕海君河伯咸朝宗
此時安得起此翁揮毫繪獻明光宮侍臣更有揚執戟
口吐白鳳文辭雄傳之千載示得意云高上與軒轅同
懷哉此翁不可作獨撫遺墨勞予衷

酒鑪行與魯侍講同賦

長安城中多酒家當鑪少女顏如花少女年纔十五餘

肌膚綽約紅羅襦金杯當戶留客醉玉顏一笑傾城隅
城門初開曉鐘罷貴客喧喧動車馬看花或自上苑來
曝直時從建章下三三五五坐綺筵驂騶繫在垂楊邊
東風吹春入歌笑餘音杳靄飛青天共言佳人不見得
黃金如山亦不惜城頭日落懽未闌更促張燈重開席
君不見東家少婦貧無粧日日垂簾不下堂

龍友行與曾侍講同賦

有序

唐書長慶元年吐蕃遣使請盟定疆俟命大理卿劉

元鼎為會盟使就盟其國元鼎踰城紀抵河廣武故
時城郭未隳蘭州種皆杭稻榆柳岑蔚戶皆唐人見
唐使者皆夾道觀至龍友城耆老千餘人拜且泣問
天子今安否頃從軍沒於此子孫猶未忍忘唐服又
問官軍何時來言已皆嗚咽密訪之豐州人也

龍友古城連大磧黃雲茫茫沙草白城頭老人七十餘
云是都護西征之所沒忽逢使者從東來觀者滿城麾
不開老人獨向馬前泣為問長安來幾日長安消息寧

盡聞天子想是開元孫闕山不改舊時月兒孫尚憶先
朝恩嗚呼來時今老矣夢飛夜夜交河水天兵何日下
玉關擬斬蕃酋報天子但令房杜姚宋廊廟間不用甲
兵天下安

送舒同文會試

北風號寒天欲裂美人款門來告別借問美人何所之
東書遠上黃金闕故鄉朋舊喜且驚玉壺沽酒爭送行
黃金擘柑曉霜重白魚膾玉紅絲輕此行端可為君榮

廟堂正爾思俊英青霄佇見奮孤隼勺水那得淹長鯨
賈誼豈止漢博士班超元非魯諸生予亦少年忝簪纓
壯心竊慕千載名出門向君一長嘯大江萬里青天橫

題王孟端畫竹

王郎昔年愛畫竹興至不須求者促清湘淇澳入壯懷
白晝雲雷起平陸鵷鸞冥冥曉垂翅珮玦落落鏘鳴玉
建章朝回鳳池靜幾擲霜毫自捫腹祇今此圖尤絕奇
蕭然獨立清秋姿長江水深滄溟濶幾時斫得珊瑚枝

綠窓坐對清晝遲涼風吹香入硯池乃知好手不可得
凡畫紛紛徒爾為

題朱季岳畫菜

冰壺道人久矣去世上富貴徒紛紛金谷園中歌舞地
祇今蔓草愁寒雲吾家有菜一千畝紫翠茸茸爛春雨
空齋釀作百甕齏朝攜暮攜樂清苦久知此味世所稀
贈君遠上黃金闌盤餐慎勿厭清瘦但令四海蒼生肥

紈扇

夜騎丹鳳天上游拾得明月青雲頭翻身揭取北斗柄
製就揮洒十二樓一揮毛骨風颼颼再揮天地回清秋
若為西上崑崙邱一洒執熱蒼生愁瀟瀟八極清風周
瀟瀟八極清風周

題梅花次沈士庶韻

雪山粘天粲朝陽霜氣壓人千尺強玉虬崢嶸奮頭角
挽却元氣回玄方明珠領下十萬斛一一照地生輝光
常從宓妃浴水濱凝松瘦竹寧與隣天然風骨自超絕

豈假粉黛添精神春風東來浩無涯一夜影落仙人家
浮花浪蕊總粗俗遊蜂狂蝶徒紛譁高標自信非噲伍
凌歷風霜豈云苦莫驚枝出萬重雲自有根盤千尺土
仙人勸我春滿盃醉時似被霜娥推瑤瑤地拾不起
一片霜月寒爭輝花邊時有孤鶴鳴羅浮姑射空馳情
南樓酒醒夜初靜一曲陽春動清興

題王孟端枯木竹石圖

王郎胸中何太奇酒酣寫此屈鐵橫空枝神蚪頃刻露

頭角霹靂繞空秋雲飛驚飈入夜撼不散白日忽出開
陰霏暖回草木作春色翠入天地揚清輝我來觀之長
太息如此奇材那易得會須構作魯靈光獨立崢嶸倚
空碧

霽雪圖

雲封山嶠寒不開白雪散亂隨風來蕭蕭茅屋讀書處
一夜化作瓊瑤臺望中可是襄陽客驢背吟詩傲寒色
興來何用作推敲佳句驚人陡然得灞橋薄暮猶未還

水聲激激天風寒後來作者誰可攀空餘勝事留人間

題錢舜舉畫山水圖

我生性愛遊名山獨掃雲石清泉間樹陰繞地綠雲合
松氣一簾蒼霧寒東村西崦人家住日出滄溟海霞曙
任他芳草滿逕生隨着清溪放舟去翠崖丹壁千萬尋
彩色下射春波深劃然長嘯萬山靜天風吹送鸞皇音
時來偶向東山起拄笏朝朝看爽氣今日君家見此圖
恍然如在林泉裏朝回無事坐粉闥手拂空翠開烟霏

碧蓮萬朵坐中起彩雲五色窓前飛安得鵝溪絹千尺
好請錢郎放雄筆不論五日并十日掃遍高山與奇石
掛公高堂之素壁彼為公畫我為公吟願公經濟有餘
暇適此逍遙廊廟心

武當山瑞應祥光

武當靈山自古聞七十二峯鬱璘珣磅礴厚土出雨雲
中有至人古聖神先天道合太始真宰制萬靈握玄鈞
陰陽闔闢造化根赤虬蜿蜒龜伏蹲二氣始醇郁氤氲

手提三尺時下巡披髮坐乘玉麒麟宣帝正命福下民
玄功陰翊我聖君奮張天威振吾軍霆春飈擊雷鼓震
電車閃爍朱兩輪玄纁下指纓繽紛蕩除羣邪廓昏氛
聖心乾乾篤靈飭睠彼玄構久乃湮大而新之勅貢臣
上酬考妣罔極恩下祈民康歲豐殷羣工謳歌揮斧斤
萬姓駿奔夕與昕嘉禾杉檜梗枏椿代山開雲鑿翠珉
珠樓紺宮煜然新璇題丹甍薄蒼昊夜半下見扶桑暎
人心允和神悅欣天祥地禎聿來臻圓光煌煌闕輪囷

瑞彩五色分成文
玉虹盤旋間赤瑞
通明天開手可捫
黍珠忽見雲中身
大袍脩裾儼垂紳
二仙後從帔霞紋
四仙旁侍肅有倫
節旄旛幢雜玄纁
大旗錯落羅北辰
靈輝四垂燭九垓
萬象晰耀熙陽春
下民具瞻咸所親
抃舞頌呼維至尊
孝恭祖宗肅明禋
升中享帝恪以寅
神降之福志愈勤
從茲慶禧益蕃純
日星順軌雨露均
來牟溢野粟滿囷
率宇宙為唐虞人
上帝永觀德是敦
億萬斯年鎮乾坤

梅花吟

長年見梅花每與梅花醉今年見梅花當為梅花淚梅
花自奇絕人事如今別花下一徘徊若聽梅花說不願
傍官驛驛外塵飛多馬迹幾番驛使入南來南枝折盡
花狼藉不願在深宮娥眉人去壽陽空繽紛簷下花飛
片不上宮粧入草叢不願在西湖舊日逋仙跡已蕪可
惜暗香疎影處新來多是拾樵蘇不願近東閣無人更
管花開落黃昏風雨鎖朱門和羹人半歸沙漠只願開

向千岩窟龔虐憑陵任風雪花香不掩戰士魂花飛不
點流民骨吟翁索笑癡更癡豈識梅花欲避時騷經一
字不拈出靈均與我深相知

七言律詩

北京八咏

居庸疊翠

岩巒重疊倚天開翠色橫秋海上來萬里長城連朔漠
九霄佳氣接蓬萊聞雞關吏開門早貢馬蕃王納土回

願刻蒼崖歌聖德漢家今數子雲才

玉泉垂虹

碧嶂丹崖瀉不停翠微雲淨轉分明春風不散空中影
夜月偏聞樹底聲內苑分來瑤草合御橋流出鳳池平
仙源信與人間別歲歲年年長自清

太液晴波

仙沼天開近帝闈碧漪千頃漾晴輝春涵樹色浮金闕
暖泛花香映紫微神鯉遙從銀漢躍水禽長帶彩雲飛

百川喜逐恩波遠萬派朝宗向北歸

瓊島春雲

瓊園瑤臺接太清鳳紋龍彩照春晴九重自逐祥風轉
五色長承瑞日明珠樹望來留鶴馭翠華行處拂鸞旌
為章共仰文明化願效周詩頌太平

薊門煙樹

萬家楊柳暗春城曙色微分乳燕鳴空翠不隨香霧散
清陰猶帶曉寒輕平川杳靄迷征騎小苑依微拂去旌

最是清明看花處幾迴吟望獨含情

西山雪霽

日華初映最高峯玉樹凝輝在半空佳氣迴浮丹鳳闕
清光遙入翠微宮松崖乍逐春風散雲嶠仍含夜月重
青瑣朝回頻極目却將郢曲詠年豐

盧溝曉月

河上人家尚掩扉河中孤月蕩寒輝清霜古店聞鷄早
落葉空林見客稀飛鴈漸隨秋影沒遠山還映曙光微

壯游記得從東道足馬高吟此際歸

金臺夕照

山色微茫映古臺平原千里夕陽開誰知碧草遺基在
曾見黃金國士來樹繞河流天外去鳥翻雲影日邊迴
清時自重飛熊叟不獨奇謀得俊才

南昌八景

西山積翠

西山秀出匡廬岑翠壁萬疊蒼崖深長空不盡太古色

喬木自下高秋陰半峯日落鳥雙度絕澗月明猿獨吟
欲覓洪崖舊隱處向風一寄瑤華音

南浦飛雲

崇朝爽氣西山晴縹緲乍見空中明沙光遠蕩石動色
天影倒射江無聲迢遙玉筍帶廬岳倏忽蒼梧更赤城
晚來為雨定何處高閣畫梁無限情

徐亭烟樹

南州高士湖上亭古木籠篴枝崢嶸孤標直與元氣合

千載尚見斯人清雲來扶桑蕩晚色雨入彭蠡迴秋聲
生芻一束不可致擊節浩歌勞我情

滕閣秋風

高城差戾千尺樓曲檻之下長江流鳴鐘日出賓客會
擊鼓波靜龜鼉游青山幾見海上月碧樹先得江南秋
會乘爽氣最高處夜攬白雲觀斗牛

洪崖丹井

仙人丹成飛上天遺此碧甃之清泉金蟆夜伏海底月

白鼠晝臥林中烟長松拔地已千尺蟠桃開花知幾年
吾將三咽叩天鼓拂石坐讀瑤華篇

鐵柱仙蹤

豫章城中旌陽宮鐵柱下與滄溟通九泉深瑣地脉靜
萬古不共長江東風雲瀕洞蛟下蟄雷電晦冥神降工
異哉靈跡不可測河洛因之思禹功

章江曉渡

江烟漠漠州渚微語笑隔岸行人稀霞光照海月在樹

水聲激石風吹衣
高城樓閣霧中出
遠浦鳬鷗沙際飛
西山亦有高尚者
獨臥白雲猶掩扉

龍沙夕照

積水之外高春微
滿目益見江山奇
豫章翻風撼遠色
若木蕩海迴高枝
落霞孤鶩不可極
丹崖翠壁更相宜
酒酣安得鄭虔老
令渠寫畫兼賦詩

出龍河次胡祭酒韻

畫船鳴鼓發官河
共說仙郎此地過
山色遙連吳苑樹

雨聲微長楚江波蒲汀渺渺來魚艇柳岸悠悠起棹歌
春日共承恩澤重風光隨處散陽和

晚經淮陰

旅懷詩思共依微河畔移舟對夕暉平沙杳杳人孤渡
遠水悠悠鴈自飛重城月出鐘聲盡極浦烟深樹影稀
惆悵王孫徒極目白鷗來往釣魚磯

次下邳

河上飛花入酒盃東風停棹此徘徊沿堤細柳春先發

背水孤城晚自開
白鳥遠從淮上沒
青山多向沛中來
扁舟明發彭城郡
訪古應過戲馬臺

戲馬臺

英雄此地有遺臺
故國荒涼楚水哀
霸業已隨王斗碎
鄉人不見錦衣回
山頭落日沉波去
天際悲風帶雨來
不獨咸陽三月火
曲池高榭總成灰

御賜武當山榔梅

仙果遙從福地來
寶函初向御筵開
捧盤中貴傳宣賜

當殿羣臣拜舞迴身對天顏
雨露袖攜香氣出蓬萊
金穰永協豐年瑞萬歲千秋貢玉臺

送陳負外子魯使西蕃

劍騎翩翩出武威關河秋色照戎衣
輪臺雪滿逢人少
蒲海天空見鴈稀蕃部牛羊沙際沒
羌民烟火磧中微
茲行總為宣恩德不帶葡萄苜蓿歸

少師姚公見寄新茗兼示以詩謹奉和答酬二

首

烟霞曾逐武夷人，摘盡仙岩幾樹春。
常笑茶經收未遍，每於泉品較來真。
雲濤汎曉當窓響，澗月分秋入甕新。
此日玉堂勞遠惠，不勝清思挹芳塵。

早從方外識天人，仗策從龍四十春。
道向玉毫傳得秘，書從黃石授來真。
錦袍玉帶承恩重，碧水丹山發興新。
借問古來名達者，幾人能此絕清塵。

邊將

曾驅飛將下天關，太白光芒照夜寒。
暗出奇兵搜瀚海，

遠追窮虜過陰山
琱戈高枕風塵靜
白羽清談意氣閑
為報漢廷諸將相
臨邊如此古來難

少年將

翩翩馬上帶雙鞭
寶劍珠袍美少年
奮直每從雙闕下
射鵰常在萬人先
傳來鬼谷兵書秘
演得魚麗陳勢全
為問防秋老邊將
白頭曾未上凌烟

夏日閒居樂 二首

綠竹蒼松引夏涼
方塘曲沼藕花香
千峯獨對空山靜

一鳥不鳴清晝長
春得細糧如玉子
釀來新酒勝瑤漿
人生快意能如此
何用荒唐入醉鄉

翠竹垂陰喜晚涼
蟬聲斷續艾荷香
鉤簾坐久暑無到
得句吟時興自長
閒展湘紋蘄竹簟
愛斟琥珀荔枝漿
生涯物外渾無事
不似儒官滯一鄉

雨中會司訓舒同文書樓

小樓對坐雨來時
愁思茫茫爾所知
負郭田荒苗帶草
高堂親老髮垂絲
一聲黃鳥朝捫蠅
滿眼青山晝咏詩

却笑山陽狂阮籍窮途何事不勝悲

游湖漫興醉中走筆呈孟博孫公

紅蓮白蓮開滿湖小娃唱歌閒且都故人相會能幾度
美酒何妨傾百壺雙拳藏闥握松子萬錢賭勝賽擲菰
暮歸酩酊白馬上誰識山翁非酒徒

西湖飲游書贈沈茶博

百斛美醪終日醺碧甌偏喜試先春烟生石鼎飛青靄
香滿金盤起綠塵詩社已無孤悶客醉鄉還有獨醒人

因思瀑直鑾坡夜特賜龍團出紫宸

留別孫孟博

相辭明日去朝天楚水吳山興杳然千里斷雲隨去馬
一江明月載歸船草廬晦跡憐君老玉署登名愧我先
預買蜀牋三萬幅朝朝揮寫寄來篇

留別林宗旦

交游曾憶十年前西舍東隣隔幾烟萬卷詩書連架讀
一窓風雨對床眠霜蹄自足行千里雲翼還期入九天

金少日人卷一
卷四
何事相逢復相別暮雲春樹思悠然

挽袁太常廷玉代時彥作

蚤從藩邸識天顏喜得功名半世閒歸去天涯雙白鬢
夢回江上一青山寒巖夜靜聞猿唳秋浦雲深見鶴還
寂寞遺莊何處是數株烟柳夕陽間

哀醫士林叔旻

初從海上見三山虛得仙經論大還天上鶴書真有名
枕中鴻寶竟誰看風吹丹旆秋雲杳草宿荒墳暮雨寒

遙想襄陽老耆舊懷君終夜淚潛潛

李士端杏軒詩卷

爾祖東垣積德深孫枝挺挺茂森森囊中賸貯君臣藥
脈底能安父母心軒外杏開花綻錦井邊橘熟顆垂金
何時解印歸來日拄杖敲門與細吟

丈會軒為句容司訓搖昌賦

紅杏花香槐樹陰焚香長日對青襟心通秘檢從教問
口誦遺文不待尋暮雨自滋塔下草春風時動壁間琴

愧予衰朽登天祿獨對青藜坐夜深

七言絕句

題梅花美人圖

欲尋春信苦無因行遇梅花却怨春
妾貌與花俱似玉可憐不見隴頭人

題歲寒亭卷

宜春園裏百花香嫩綠嫣紅競艷陽
寧似歲寒亭下友獨凌寒色耐風霜

題畫菜為周郎中賦

生平常誦伐檀吟獨愛春畦紫翠深
隨處烹羊與魚鱉
醉歸還此對彈琴

送江克顯還杭

餞別江亭日未斜東風開遍禁園花
朔雲吳樹三千里
一路青山直到家

題梅花紈扇圖為沈公甫賦

瘦蛟天中倒垂尾萬斛明珠懸額底
長風半夜海上來

和月墮落青雲裏

題青山白雲圖

蘿薜陰陰覆野亭
雨餘春樹滿春汀
白雲一任風吹散
放出溪山幾點青

題畫二首

初日高峯照畫堂
乳鶯啼處綠陰長
朝來試看春多少
一路桃花澗水香

兩岸荻蘆秋著花
釣絲烟艇隔人家
白鷗飛盡孤雲外

萬丈青山帶晚霞

題張真人墨竹 三首

河漢凝雲淡不流
玉簫聲斷鳳凰樓
天風吹下瑤臺露
散作人間五月秋

翠竹蕭蕭粉署陰
疎簾高捲畫堂深
朝回日日焚香坐
愛爾凌雲一片心

翠節香根帶雨移
蕭蕭偏與靜相宜
春花零落秋霜後
獨立青雲君始知

紙帳為虎跑求上人賦

紙帳溶溶似雪輕
幾迴聽徹萬松聲
天風吹破中宵夢
只有空山片月明

題鷓鴣圖 二首

楚雲深處自飛鳴
江草江花總是情
兩岸客舟聽不得
春風併入棹歌聲

黃陵廟前春日晴
黃陵廟前春水生
孤舟送客楚江暮
落日時聞三四聲

題竹次夏文度韻

谷口森森玉萬竿，鳳毛搖動不勝寒。
西窓記得曾留闕，月送青鸞醉裏看。

題紡績圖

紫羅步障遊時展，紅錦纏頭醉後分。
寧識田家重耕織，繰車終夜徹青雲。

紅白荷花圖為湛知縣題

並蒂笑渠出水新，翠裳紅袖玉精神。
半醒半醉秋波裏，

愁殺蓮塘蕩槳人

過楊州東關戲王時彥 二首

楊柳青青水岸斜
城中初日散啼鴉
關情最是閒桃李
處處春風解放花

高樓小婦坐吹笙
楊柳春風動遠情
却笑天涯芳草色
青青常是逐人行

與時彥登岸折梨花口號

一樹繁花開遠田
閒來攀折曉風前
天涯何處無春色

不遇情人空自憐

題竹贈沈公輔

丹山月出綵鳳舞
湘江雨歇蒼龍吟
長風萬里楚天碧
一枝高拂秋雲深

題無為天師畫渭川秋雨圖

朝天初自玉清還
鶴氅生涼鳳管閑
想見上方揮洒處
雨餘星月滿仙壇

題梅花萬玉圖

大珠小珠千萬斛滿地月明護寒玉東風吹闌

憑闌聽徹南枝曲

題張真人畫竹

雙成醉後鼓雲璈一夜涼生翠羽毛長空萬里關
歷歷白榆秋影高

五馬圖

五王花馬早朝歸侍宴彤廷出禁遲一派玉簫人醉後
芙蓉園裏浴春池

題竹次夏文度韻

種成無數碧琅玕
翠羽常含宿雨寒
半夜行雲瀟灑過
小窓欹枕夢初殘

詠朱買臣

印佩黃金出帝畿
錦衣閭里亦光輝
覆盆橋下東流水
曾笑擔柴獨自歸

詩餘

舟人竹枝詞 五首

妾貌如花朝暮新郎心似水蕩青春相逢好是迴塘路
荷葉深深不見人

門前楊柳岸邊花幾度逢郎來吃茶日晚莫關

月明直送到儂家

荷花浦頭春月明問郎何處唱歌聲月明易缺似郎意
花開不斷是儂情

前年糴米上瞿塘今歲裝鹽過岳陽伴侶相逢終日醉
有錢不似在他鄉

五月瞿塘無客過黃陵廟前春水多但使黃金隨處有
任他湖海足風波

夾城八景

夾城夜月

孤月泛江秋露下高人靜期着佳人夜不來坐轉霜梧
影吹徹紫鸞簫寶篆烟銷鼎桂子飛香下廣寒銀漢
秋波冷

斗門春漲

驚雪噴高崖雷響青天曉剛道吳胥駕海來勢壓滄溟
小滿岸是漁舟撥亂飛春鳥誰信神魚去不留五色
祥雲繞

半道春紅

宿雨漲春流曉日紅千樹幾度尋芳載酒來自與東風
遇弱水與桃源有路從教去不見西湖柳萬絲滿地
飛風絮

西山晚翠

斜日照疎簾雨歇青山暮白鳥鳴邊一半開香靄和烟
度樓上見平湖影隔青林霧吹斷鸞簫興未闌月照
芙蓉露

花圃啼鶯

旭日照芳林鶯囀春風早一片紅雲暗不開無奈春聲
攪乘興且閒游莫待韶華老隨意飛紅點綠苔休着
家童掃

皋亭積雪

積玉映空青蓬島人間近珠樹瑤華滿眼開縹緲仙臺影
便欲跨青鸞直上三山頂鶴氅披雲看下方月白銀河冷

江橋暮雨

淅瀝帶秋烟兩岸蒹葭響何處漁舟暝未還隔浦聞清唱
撩亂下枯槎一夜苔溪漲天目應添翠幾重明日看晴嶂

白蕩烟村

綠竹繞清流
草舍人家遠
幾處牛羊晚
下來烟外聞
雞犬
禾稼滿秋原
路向桑麻轉
簫鼓從教樂
社神歲歲
常相見

穀齋集卷四

欽定四庫全書卷

穀齋集卷五

明 王洪 撰

序

序文

六經之文至矣周秦而下子史百氏可以觀其變焉
易之道變書之道治詩之道志禮之道分春秋之道
法孰不以為天下之至文然聖人之心非特為文設
也為天地廓為人道極為萬世學者之準也故身行

之口宣之策書之苞諸天地而彌綸之探諸鬼神而
微顯之叙諸君臣父子夫婦長幼而惇勅之著諸禮
樂刑政而齊一之稽諸吉凶成敗盛衰而警勵之博
諸鳥獸昆蟲百物而區別之其言之所立其道之所
傳仰乎百世之上昭乎百世之下性而由之者聖求
而復之者賢悖而絕之者愚而人君用之精則王駁
則伯棄之則滅斷斷乎不可易此聖人為天下後世
之心雖不為文而自不能不為文也後之學是者吾

惑焉不求其心而規其語言不躬行實踐而支離乎
筆舌斷斷焉惟恐言之不文而去道益遠務博者龐
好奇者譎論高者誕甚者一切屏去繩墨而講張之
放情以為高關以為關騁詐以為功用其褻說曲

知以蔽天下耳目使學者心志喪惑而生民泯然不
見先王之治噫文何其不幸至若是也雖然是非文
之過也為文者之過也為文欲以傳詔後世而其患乃
若是可不慎乎

序書贈吳從善

錢唐吳君從善以書學為給事中。以余嘗從事於書也。數有徵於余。余媿不能為役。則以其所聞而告之曰。書之源古矣。至後世而變益盛。自科斗之大小篆之隸之行之草。恍乎若春夏秋冬之遞遷。而君子不能無慨然世道之感焉。秦之先也。若蒼頡沮誦史籀程邈。徒以作書名而已。至漢杜蔡魏鍾索。吳皇象。晉王廙。隋智永。唐虞。歐。褚。薛。顏。柳。始皆專能書之名。至宋米蔡蘇黃。而其

變極矣後之學書者固莫能出於是也然自是來數百年間未嘗聞有升杜鍾之堂入二王之室者豈其資性皆不及古之人歟將法之不傳後之人莫之能究歟若夫形聲事意之別偏傍之正波磔努勒之法固有存於書者矣又豈所謂大匠能誨人以規矩不能使人巧歟蓋嘗竊以為古人之法具存於書因其法而求其意求其意而盡其妙則君子宜盡心焉抑亦似吾學者之為文乎吾學者之為文也聖賢經傳史氏纂記諸子百家

之著述讀焉必究其本涉焉必尋其源咀嚙其菁華吟詠其音聲鼓舞其節奏別其是非而窮其指歸其為文也內純而外一含和而守固榮不敢慕乎利祿以汨其志危不敢懷乎患難以挫其氣華不敢狙乎采色以昏其神淫不敢溺乎音樂以蕩其守憺乎與天地通肅乎與神明一超乎宇宙之表而攝之方寸之中邈乎百代之前而著之瞬息之內於是易之奇書之正詩之溫醇禮之典則春秋之簡嚴史氏之精核諸子之辨博其於

物也天地之遠大日星之昭布山嶽之崇峙江河之奔
放草木之華麗壘洗簞簞之簡質孤子之悲出婦之怨
戰士之剽悍端人之莊重忠義之感激隨其所向各極
其趣蓋從容於法度之中而優游於意態之變於是庶
幾乎為文之至矣學書之法果異於是否乎今夫農必
勤播五穀之種然後有獲今夫御必習交衢之舞然後
逐水曲上下而無敗而況於書乎雖然是皆所謂藝也
古之君子固有欲學問希聖賢德澤潤天下名聲顯後

世不屑於此者矣然亦能之足以不朽者又何必待乎
其他哉今聖天子樂天下治平崇尚文學詔天下能書
之士學於禁林嘉會之意甚厚而吳君又能卓然以能
書進有名於時則所謂升堂入室者將有在於吾從善
矣從善因吾言而盡其所用心將復有大於是者由是
得焉豈特書也哉

贈御醫陳德中序

古者聖人立教養民以人之生函陰陽五行之氣內鑿

乎喜怒哀思愛惡欲外薄乎風寒暑濕燥火不能無病
於心則盡於目則盲於耳則聵於手足則廢甚者至戕
其生於是因人血脈經絡骨髓陰陽表裏藥物金石草
木鳥獸蟲魚之屬味其甘辛鹹苦性其剛柔燥濕寒熱
臭其芳烈色其青白黃赤而別其倫類等其重輕制其
物宜察乎氣之所感疾之所在隨向而投之如決渠去
穢驅盜出室而保護赤子俾盲者明聵者聰廢者起盡
者瘡咸復其初而生不害至後世之士如扁鵲和緩者

克精其術亦往往有以濟世史氏從而傳之與功業豪傑之士同著不朽且錄其文次諸六經諸子是豈徒然也哉蓋聖人之教民之死生所繫如此之重誠不可得而泯也班固嘗曰醫自倉公以下其學晦昧有病不治常得中醫然自仲景以來數十百年河間東垣潔古雲岐之流著論辨明以上達軒岐之妙學者由是取道焉則又不可謂天下後世果無其人也吾鄉有陳氏者業醫六世尤工治目眚之疾至德中及其弟景中進業益

精用薦來京師遂為太醫院御醫名聞四方今年兵部尚書方公從子年幼病目嘗求諸里醫治之弗效求之邑醫弗效求之郡醫又弗效乃曰京師衆醫之所萃也宜得其良於是攜至金陵求諸醫之良者春坊中允于公以陳氏薦治之不數月而愈噫天下固未嘗無難治之疾亦未嘗無能治之醫以難治之疾或付之庸醫以能治之醫或置而不問則屢求而屢失若陳氏之善醫于公之知人可謂兼全而兩得者矣方公謀有以報陳

氏者乃來徵予文予史氏屬也百家衆藝咸得論著況陳氏醫術其良如此者耶故不辭而贈以言其尚有進於古之人也乎

夏日文宴詩序

永樂己丑夏浙江都指揮使蔡公合大叅易公翰林檢討王洪洎學官方外之秀宴於清湖里第風日和美肴羞維時揖遜獻酬以壽以樂大叅公嘉是會也舉昌言拜舜禹之句俾諸君子各占韻賦詩而屬洪序之洪竊

惟今聖天子在上德化宏敷文武效職時和年豐民物
熙寧二公以方叔山甫之材授藩翰之寄統有浙東西
十一郡之地百萬之衆克宣上恩忠勤並隆兵農咸和
於是仰政教之大成樂休沐之間暇徵賢合才設是良
宴雍雍揄揚歌咏太平之風洪也以閭里細氓備職詞
苑承恩南歸藐焉末學而齒賓席之次謝過弗暇奚敢
當是子夏任哉雖然抑有不可以不志者宴而有禮不
吳不傲一也加禮末學使後進知勸二也舉詩以訓造

次弗違義三也三善具而咏歌繼之鏘乎金石之奏燦
乎珠貝之列凡在卷者皆可傳而誦也故僭次其詩自
大叅公以下凡若干首而序以弁之是歲閏四月廿有
七日翰林檢討王洪序

夾城八景詩序

錢塘山水之勝聞於古尚矣夾城者在郡城之北其一
偽張所築其一故元將楊完者營也今廢地值二城之
間故曰夾城丙午歲天兵自昱嶺關下餘杭守將以城

內附郡邑數十萬之衆始得脫去僭偽歸於聖朝沐浴
恩德上事父母下育妻子生息作業至於今五十餘年
之間歲時豐登民物滋殖有加於昔而山川之靈亦效
奇獻秀或蒸為卿雲或溢為醴泉鍾於人為賢才同發
舒於光天化日之下蓋山川人物乘國家氣運之盛固
其理然歟洪友夏文度自城中徙居夾城之北隅凡朝
夕之所遊耳目之所及風烟雪月奇偉清秀無不可愛
於是列為八景作詩紀之前禮部郎中王儀之鄉貢進

士張行素處士項伯藏孫孟博皆和之聯為大軸於是夾城八景遂大傳於時人皆以為數百年之秘至文度始發之而不知皆由上之恩德休養生息太平無事至於如此之盛也噫洪自七八歲時從大父玉岩公來居於茲自學至仕三十餘年其於斯景譬如賢知奇俊之士接膝而莫之省也於此蓋有以見文度之識過於洪遠矣故為題其端使鄉人觀之而咏歌太平君子固不可以無作也

送張行素序

錢塘張行素自臨淄幕官中鄉薦會試禮部以疾不克
終事將渡河而東歸賦詩別嘗所來往者行素予故人
也善為古文詩歌往往清麗可喜其志銳然欲追古之
作者以顯名於世顧不能自進乃從諸士子羣試於有
司又以疾不得願而去其可慨也歟豈所謂顯晦利鈍
有莫知其然歟將莫之為而為而力有莫能強之者歟
夫君子求其可知者而置其不可知者則知益明盡力

於可致者而不強其所不可致者則行益至由是言之
則行素是行雖可慨也其又有可重者歟是故進退者
事之機也得失者時之會也感激者勇之發也曹劌名
將也三北於齊一戰而勝之名聞諸侯匡衡漢碩儒也
屢薦而弗售卒至宰輔是何以然哉彼固有所激也不
然則彼二子者不免三軍之負將而已耳閭巷之小儒
而已耳烏能致遠大乎此所謂屈之而伸損之而益困
而亨晦而明鬱而通大丈夫有志者之所為而非尋常

委墮淺陋自詭以命者之所能至也行素身癯然若不
勝衣言訥然若不出諸口人視之溫然儒者也而胸中
所存毅然有莫能禦者負其所學外不求諸人內不失
其守一不如志則攝衣而去畧無幾微沮洳之色且欲
益勵其志廣其問學必底於成而後已噫是可重也歟
世之所謂士者幸一得志不翅侈然自足不得志則沮
而怠耳其視行素賢否為何如也夫不以歲之不熟而
輟其耒耜者天下之良農也不以器之不售而廢其規

矩者天下之善工也苟一過焉所得不既多乎勗哉行
素方當聖明之際登明選公有志而不成者未之有也
於其行姑以是贈之

送沈景清歸省序

戶科給事中沈君景清之請告歸省也始奏之明日翰
林檢討王洪禮部員外郎孫迪仲約暨諸鄉邦交游者
踵跡更賀其行也又皆出都門外十里飲而送之雨雪
新霽路無浮埃車服濯濯照映道路仲約謂沈君茲行

足為其鄉邦父母榮也屬洪文以張之子惟凡人父母之育子也幼而愛長而教恒患其不克成立而賢苟賢矣又患其不得仕於王朝揚芳邁烈顯庸於清時苟壯矣又患不得躬目其光華身受其祿養以慰教育期望之意此人之至情然而克全此者鮮矣厥有教而賢賢而仕仕而身享其報豈非難得者哉宜乎吾黨之士為沈氏慶也古之君子固有身都將相食祿萬石出有結駟之華入有列鼎之奉其心不樂以戚亦有不擇官而

仕其志樂者何則父母在雖小亦足自樂也況沈君於此其小者固萬萬其樂大者又足以自致者乎沈君賦性明敏好學而篤行發迹邑庠蜚英太學一旦褻然居侍從之列揚言王庭珥筆丹陛依日月之清光仰天威於咫尺今茲承恩而南歸也綵衣高堂奉觴拜慶祿足以養之官足以顯之名足以昭之賀聲洋洋盈溢閭里賢哉沈君茲行真足以為鄉邦父母榮也雖然吾聞君子之仕榮其身必榮其親榮於一鄉必榮於天下榮於

天下必榮於萬世此忠孝之大者以沈君之材之學而
又加勉焉其患不至哉洪與沈君同學於蓬居先生之
門仲約又其同志者也故於其行喜之最深期之最重
而序之特詳焉

送湛用和序

錢塘湛君用和以明經中進士第擢內江知縣將行友
人庶吉士吳子厚張憲刑科給事中曹德脩來徵余言
為贈余惟郡國之化自縣令始蓋令於民也甚近近則

易親親則易化顧其政何若耳是故猛可以使民畏未
可以得民心寬可以得民心未可以善其俗語而或悖
之禁而或犯之招而或去之其心未得也沉於利悖於
義咎於德易於法而懵於教訓其俗未善也是故君子
必教之以孝弟忠信風之以詩書禮樂養之以寬厚和
惠選其賢良而表章之擿其奸獮而芟鋤之存其饑寒
而衣食之時其力役課其耕桑而休息富庶之民於是
乎靖嘉風俗丕和而政治以輯古之所謂良有司亦不

過若是而已而後之為是者吾惑焉汨其本原而究其
末流患德之難循而快於威之易行於是狙之草菅之
斧斤之民噢咻而政益急俗苦窳而教益弛雖良二千
石亦莫之能理此余所以常歎吏之不學而善治或寡
也湛君華年好修且其為人聰惠端謹窮經力學尤潛
心於詩人溫柔敦厚之教以是而為政也其將有以得
民之心歟有以善民之俗歟詩曰豈弟君子民之父母
余於湛君是望故以此告之且使夫讀詩書者知所以

金史卷五
為良有司在此而不在彼也

送張愿中序

錢塘張君愿中由進士中高等為工科給事中未幾出
判永寧其行也友人李君孟博徵余言為愿中贈永寧
古西南夷之地其山川險惡其民椎結藍縷鳥獸與居
性復愚獷怒則拔劍相刺擊至親戚不顧蓋三代所不
治也漢武帝開夜郎畧羌僰久而後得魏晉以降羈縻
弗絕或紛不可治則一舉而殲之不少貸至於天朝威

德治洽無遠弗届西南諸夷皆俯首面內願出租賦聽
約束奉法度與中國氓等於是因前代制立郡縣置吏
以治亦務安輯之而已然吏或貪暴則雉驚兔逸入山
林險阻晻昧不見蹤跡政用不集而人靡寧嗚呼亦難
矣哉是以君子於斯必知其俗平其政而後可得而理
也昔者太公治齊平易而民歸之班超在西域以寬大
得士卒心因其俗也黃霸守潁川民用不擾諸葛武侯
治蜀南人畏服平其政也於是乎德以勞徠之和以柔

之威以鎮之寬以待之如是而人不服政不成者未之有也是故震風撼木不若惠風之煦萬物也鷹鷂搏擊不若鳳凰出衆鳥馴服也君子強察以為政不若仁厚之入人深也故林木茂而鳥獸至焉江河深而魚鱉萃焉君子仁義積而衆庶歸焉易曰信及豚魚豚魚至無知也信尚能動之而況於人乎張君英材俊學一舉而為名進士其登崇進顯固將有待然所以宣布上德嘉惠夷人使其帖然安樂而政治以興吾於張君之行深

有望也若夫紛更以為能撻拾以為明欲速不達者此則瑣瑣者所為余可無告故於其行特以是贈之且冀其成焉

送柴叔輿知岳州府序

予讀班固書至所傳循吏未嘗不輟而歎息以為漢之初興蕭張陳平之流智畧輻輳應時出奇以成功名及天下已定而廉直惻怛之士往往奮起於其間以師帥郡邑撫摩細民而使怡然安樂於田野鄉邑之間而無

不得分願之歎庶幾古君子愷悌之風跡其功效與智謀奇偉立武功輔王業者並傳於不朽何其盛也噫豈特時之異哉蓋應變以智安民以德固自然之理也今國家平定四海德澤涵育休養而生息五六十一年聖天子嘉惠元元尤嚴重守令之選必有所謂奉法循理之士如古人所傳者卓然出於其間故喜求而樂得之而凡士之為是職者亦未嘗不以是而致其祝望之意況時論之尤賢者乎柴公自江西叅政再入為兵部郎中

今年以薦授岳州知府命下之日湖湘南北之聞為良二千石者非他人必柴公也公聞之曰車不敢當也然不敢不勉夫贊政司馬為賢郎官出叅大藩為賢方牧又況為是一郡者乎吾知公必卓然無愧於古而不止於是也故書素所嘗論與士大夫之望者以為公贈慶其邦人且使凡為守令者視予之言有以重其職

送廣東按察僉事李公之任序

今之所謂執法之官在內曰都察院大理寺在外曰提

刑按察司司之長曰使其次副使又其次僉事也每視
事長與其貳列坐堂上叅決一道之政凡刑獄重輕官
吏刺舉號令設施憲使曰可副使曰不可副使曰然僉
事曰不然交致其能以共成其政必使刑無不中令無
不善民無不安官無不得其人此蓋朝廷設官分職之
盛意然居是任者非才且賢固莫克稱也錢塘李公益
博由名進士為兵部主事今年冬以賢勞擢授廣東僉
事之職命下之日凡知李公者莫不為公賀既有以為

廣人之慶也來徵予言以贈其行予嘗聞之人有受人之傭而為之耕者必耨其狼莠養其良苗以底於成苟怠且肆則必怒而黜之固也苗其如之何哉良苗者百姓也狼莠者害百姓者也耨之養之按察之職不如是不足以稱其職況乎嶺海百越之陬地大以遠俗雜乎夷獠而犀象珍奇之產足以蕩惑心志而可不益慎之乎今聖天子在上明刑慎獄好生之德洽於民心日月之明照乎四海雖在遐荒萬里之遠待之無異畿甸之

閒輦轂之下而李公之居是任也才有以為之識有以
達之廉有以守之吾知其彰善癉惡樹之風聲卓然為
賢僉事以無負擢任之意也審矣是固足為廣東一道
慶也能無言乎

貞孝堂詩序

御醫趙君彥殊示予雲間張氏貞孝堂詩文一卷凡若
干首予讀而歎曰盛哉何其多也非張氏母子之賢其
何能致若是耶當其夫之亡子之弱也家既危矣非母

能守疇克以立及子既壯而母且老非子能孝疇克以
養世固有冒終天之哀而二其操不克肖似貽羞父母
者宜諸君子之丈之美張氏也然吾聞之古者君子之
為丈為可傳也言之而不文不傳也文之而非關不
傳也察乎古今之變酌乎是非之公燭乎性情之關而
本乎義理之正凡臣之忠子之孝婦之貞與凡不關
值變故不失其節者彼不能言吾代之言併其難言者
而盡言焉彼不能傳吾為之傳併其不傳者而盡傳焉

其言之所立其行之所傳仰乎百世之上昭乎百世之下泰山不足為其高也江河不足為其深也金石不足為其堅也而天地之運不足為其久也由是觀之張氏母子之賢其果有傳哉莊姜之詩孔子所錄南陔白華之什君子惜其闕焉予於是蓋為之深歎也故僭序其久而傳之

送姜潤華序

行出於衆人者惟士為能若吾友姜君潤華其出於衆

者乎潤華以良家子幼而愿長而敏壯而益和以謹事
父母孝兄弟友愛特厚其季潤英以鄉貢游成均居京
師有年矣潤華歲來視焉或再至焉觸寒暑冒霜露跋
涉山水之險阻不少憚避其來也視其衣服而涼燠之
察其匱乏而周濟之問其德業而敦訓之噫吾所謂卓
然出於庸衆之士者非吾潤華者邪吾觀於人友于之
弗戒者多矣貧賤一不省視或富貴得志則煦煦然外
托骨肉私焉以為利不幸而患難掉臂去不顧不翅如

途人然斯人也視吾潤華豈不有媿也哉崇華之詩聖人所錄鵲鷦之喻君子感焉吾於是益重吾潤華也故於其歸舉以贈之

送營繕所正蔡士新秩滿復任序

營繕周冬官屬也凡國之宮室朝市塗軌經緯興作之事皆出營繕時序其法以令其屬辨之域以定其位立之表以識其景準之水以酌其平必才足以任事勤足以律下智足以守法然後可以訓飭百工仰諭天意成

國之制而大著於後毘陵蔡君士新居是職三年矣其為人也敦篤而好禮和敏而尚義其施之政也奏功聖天子嘉能焉計事同寮讓善焉約衆而百工服義焉是故休顯之聞流於天朝榮承上恩日大以著人或問之則曰吾知盡吾力焉耳吾何能哉雖然吾亦嘗學於師矣凡吾所營作也患材之弗良材良矣患用之弗當高者不可削而庠也短者不可益而長也棟不可桷也櫨不可柱也而居不可臬也用當矣患制之弗善制善矣患力之弗齊且至是

故用之當斯無枉其材者矣制之善斯無枯其器矣用力齊且至斯無遺其善者矣此吾所學於師而勉焉者吾何能哉吾知盡吾力焉耳今年春秋滿天官考其課最以例復職前浙江僉憲劉公嘉其為人欲有以贈之也命余為文且道其語若是余嘉其義書此以復之云

送楊教諭序

錢塘楊公遂初為全椒學官翰林庶吉士潘進學中書舍人葉仲榮前內江知縣湛用和慶學校得師且以余

尤與遂初好也徵文送之余因仰而言曰學校王政之本師者學校之所由興者也昔太祖皇帝受天命一四海干戈甫定即崇庠序之教府州縣皆命立學博選俊秀禮求師儒廩而教之有大學之貢有鄉舉之選拔其賢能列於庶位其為卿輔而尤賢者則求其師而聘之崇其禮秩擢為侍從六卿以旌其教育之功於是天下之為學官者靡然知勸矣今皇上表章六經弘闡聖學尤嚴重師儒之選教養益具得人尤多公卿大夫文學

之士彬彬然揄揚鴻猷論薦功德郁郁然與三代同風
蓋上之所以養育與師所以教誨而造就之者其效有
不偶然也夫漢之治盛矣高帝馬上之習不加意於詩
書至武帝時因董仲舒公孫弘之議始立學官置弟子
貲宋以文教治天下至慶歷時始州縣有學雖盛美之
事積久而後成其養士之隆待師之厚未有如我朝之
盛者也然則士君子生於斯時抱其所學卓然為學者
師作成人材以益隆太平之治其任豈不重耶知所以

重則知所以益盡其職以無負教養之意或者以為卑秩而莫之自振是蓋未知盡職也遂初篤學弘偉之士也嘗以周易舉禮部為訓導建安有名甌越之南今茲陞秩全椒造就之功宜益倍於昔以無媿吾向之所謂師者也然則吾鄙之士又安得不為全椒之士慶也故於其行與論其大者蓋亦遂初之志也

送楊君遂初還宜興詩序

予幼時與君同游郡庠善相勸過相規心相敬又相樂

也居三年同領鄉薦既又同試於春官予幸齒俊造之末備負行人君懷抱利器不得志出為宜興縣文學自是別去不得一相見今年以事來朝京師得與君會連衽促席追論往昔甚樂也昔者詩人之思君子也其詩曰一日不見如三秋兮又曰未見君子憂心忡忡及其見也則曰既見君子我心則悅又曰既見君子樂且有儀言得見君子為可樂也今予與君別四三年而得胥會於此叙其平生之歡於旦夕之頃豈天耶人耶宜乎

予樂之而不忘也然樂不久而遽別則凡我夙昔交游之士又烏可已於言乎故同里蔣良夫合諸顯融賦詩以贈書在卷軸予竊序而引之亦所以厚人倫懷舊俗敦乎禮義不悖詩人之旨也仍繫以詩王衡指春暮風日淑以暄驅車城南陌言送夫君還送遠終有別何以慰離顏沽酒為君飲取琴為君彈彈罷長歎息會面誠所難桃李自成蹊松栢守歲寒願言崇令德永矢同心歡

胡祭酒詩集序

國子祭酒豫章胡公以所著顧菴詩集若干卷示洪俾
為之序洪因作而言曰詩三百篇盛矣五言之作出於
蘇李唐山夫人之歌則駸駸乎雅頌之遺意至於建安
悲壯而激烈君子不能無世變之感及乎齊梁而侈靡
極矣唐詩倡於陳子昂遂有李杜韓柳之盛若宋諸大
儒其精深造詣蓋亦可以求其本焉元起於朔漢文制
疏畧至元天歷之間若趙文敏公虞文靖公范文白公

揭文安公亦各鳴一時之盛及其衰也學者以粗豪為壯以尖新為奇語言纖薄音律恣濫蓋自晚唐皆然末世文弊固其勢之然也聖明混一四海肇復先王之制興禮立學以風厲學者至於今五十餘年之間政教之隆並乎三代年穀豐稔民物滋殖四夷賓服瑞應荐至麒麟騶虞嘉禾芝草之祥日獻月進聖天子方舉唐虞巡狩之典以宣省風俗懷柔百神施恩惠於萬國公卿大夫文學之士莫不各奮所長揄揚盛德鋪張洪休洋洋

乎雅頌之音盈於朝廷而達於天下當是時公以儒學德行由翰林侍讀春坊諭德為大司成師表四方之士而文章卓然名於一時蓋其所作必欲追蹤古人事核而喻切辭醇而旨遠渢乎春容正大之音可以無媿於古而公則歔然自視若不足也嗚呼堯舜之盛尚書載之商周之興詩人頌焉文章有關於世道尚矣洪與公同游禁林十有餘年朝夕承公之誨至論古之作者未嘗不慨然於斯惜乎以洪之昏陋而莫能進也姑序諸

卷端俾觀公之詩者有以發焉

送夏文度序

文度昔舉進士時洪始束髮挾書冊從郡博士受業懵
未有明也當是時文度上春官衣盛服策大馬自方伯
及郡縣之長吏咸出餞都門外道路辟易父老觀者莫
不歎譽洪時在諸生之後文度雖不識洪洪竊慕焉後
三年洪忝名薦書列官於朝文度亦仕在外不見者蓋
久既而洪歸錢塘文度亦自武昌屏居於家洪因其季

始克與文度游握手笑談予二人者慨然自以為相得之晚也然文度志氣卓絕尤豪於文辭不以洪之無似愧不輕而重者多矣永樂七年洪扈從來北京文度以事遷謫上書闕下聖天子命禮部試其文中優等遂命復為太學生洪時竊贊頌聖天子天地之德立賢無方不遺一介之才退而又賀文度之遭逢聖明得蒙顯拔如此當何如報也然不久予別去矣今年復來與文度會於金臺之下竊窺文度學益篤志益厲行益恪噫洪

不見文度久矣何其老而愈成若此也至於感激奮勵
自謂蒙聖天子非常之恩拔之幽微之中置之賢俊之
列雖竭駑鈍不足以報萬一此其志又過常人遠矣當
是時六館之士莫不知其才愛而重之而不知其志如
此也君子之於事業患學之不足學足矣患才之不膽
才膽矣患志之不遠以大令文度若此吾知其造就愈
非人所能測者矣然文度不自以為足也是歲之十月
將歸省其親謂洪曰子知我者何以贈我洪為文度友

將二十餘年愧無以益其高遠也故述其舊而告之以此俾文度益知自重而觀予文者知聖朝之作成人材而懷學抱志者果足以有為庶知所以自發也

送錢叅政序

永樂十一年七月二十日詔以兵部郎中錢公述等七人為福建叅政及鹽運使之職明日上御奉天殿復詔進對從容勞問并諭所以為政恤民之意厚賜而遣之七人者頓首俯伏言臣等駑薄不足以當大任副聖意

不敢不勉又三日陞辭以行同官負外郎浦城蕭福主
事錢塘周文及諸交游之賢咸餞之都門之外復謁予
禁林曰願有贈也夫今之所謂布政使及叅政者蓋古
方伯之任其大且重可知錢公資幹偉秀而才性明敏
敦重有守而處事周給卓然為羣官稱首今茲任也其
勉焉以善其職以稱所謂重且大者又奚待於予之言
也雖然予嘗觀今之方伯所謂賢者固多見稱於時至
於徵文簿書撓法訟獄厚飾厨傳潦漢之所及百姓利

害休戚之所在漫不加省苟焉以待滿者蓋亦有之矣夫為方伯者苟焉以待滿為郡者苟焉以待滿為縣若衆職事者苟焉以待滿上下交相苟如吾民何聖天子所以加惠元元超擢屬任其意果若是乎若使為方伯者勉焉以善其職為郡若縣者勉焉以善其職為衆職事者勉焉以善其職政底於治民獲其所庶幾乎有以稱上之意然所以致此者則自賢方伯始也夫一介之士窮處草茅之中布衣韋帶幸遭逢聖明位任方岳端

名康公誦成王福祿土宇之廣矣必申之以謁謁王多
吉士而嘉樂君子宜民宜人受祿於天者蓋有取於百
辟卿士之不懈於位焉夫臣子祝頌君上之福祿可謂
至矣然必歸於得賢之盛蓋賢才有繫於天下國家者
其重如此然必聖人在位樂育而造就之然後有以成
焉惟我太祖高皇帝受天命一海內武功既成興禮立
學教育天下之士經術以造之師長以訓之廩餼以養
之衣冠以表之及才之成則科目以登之爵祿以榮之

由是四方萬里海隅徼塞之外莫不有學絃誦之聲
於郡邑而文學賢能之士彬彬乎盛矣皇上纘承鴻業
撫綏萬方益弘仁義道德之化崇獎儒術作成士類政
教昭明民物康阜而和氣充洽騶虞嘉禾醴泉甘露之
祥日獻月進仁厚之麟游於郊藪蓋軼乎三代而過之
矣然明詔屢頒賓興賢能蒐舉遺逸必欲得天下之賢
才以隆萬世太平之基蓋養之也厚教之也詳取之也
周而用之也重宜乎得人之盛有加於昔乃永樂十三

年春二月天下鄉貢之士會試於北京者三千人而與選者得三百五十人焉蓋自設科以來未有盛於茲者也然則士生斯時遭逢聖明得蒙造就如此又豈不為榮幸也歟雖然余聞之古之賢才所以異於人者以所行無愧於所學也惟諸士子必思所以自勵益懋其學卓然若古人施諸事業上忠乎君而下潤乎生民榮於當時而傳於不朽庶無負於選擢之盛意俾天下之士亦景慕而興起焉不亦美哉洪欽承聖恩忝預校丈之

列樂頌國家得人之盛而尤為諸士子勸也謹以是為
會試錄序其尚勉哉

鯨波萬里圖序

三代封域西不盡流沙南不盡衡山東不盡東海北不
盡恒山蠻夷荒服不及以政皇明受天命舉三代所無
之天下一統而有之遠夷君長自古所不能致者莫不
朝覲率職時節致水土百物日獻月貢不絕於道路朝
廷加恩懷柔遣使鎮撫之馬跡所及樓艚所至賦政宣

德如東西郡縣何盛也永樂三年吾鄉林叔旻氏以醫
從使者航海至倭國踰年而後歸遂圖其山川所歷以
誌一時之盛時出而玩焉凡江海之浩洋島嶼之迴絕
波濤之薄滴魚蝦水獸烟帆雲樹蠻檣賈舶出沒於海
潮洶涌渺茫之間者儼乎如在眉睫之下雖工人所不
能及者亦可意想而目覩也夫一草一木可以見天地
化育之功斯圖雖細而聖朝德化之大亦庶幾於是見
之而叔旻以鄉里布衣卓然能揚芳於萬里之外其志

亦可壯也故為識之

送柴僉事之任序

以待從近臣出治方岳宣聖天子之法以糾正乎郡吏
千里之內仰其風采而畏其威嚴率其表儀而聽其號
召君子之仕至於是其可謂榮且重矣以榮且重必有
以稱之然非公明仁厚有莫能為者泊乎無私物至而
應苟有舉焉不吐不如斯可謂公矣在邇知遠人莫能
欺奸無遁情幽隱畢達斯可謂明矣父之如恐傷師之

如恐亡去其貪殘而極其顛連通其壅塞而達其分願
斯可謂仁矣信能如是則千里之內枉者皆將有以正
矣冤者皆將有以伸矣貪者皆將有以化矣暴者皆將
有以戢矣遠方小邑幽細之民皆將有以安其所矣推
是以往有大於是者亦足以為也舉之非公也察之非
明也撫之非仁也雖乘田委吏有不可為者況所謂榮
且重者乎吳興柴公景春由給事中秩滿擢任湖廣按
察僉事其友中書舍人鮑君應文榮其行也求余言贈

之夫贈之為言增也柴公寬厚明敏珥筆殿廷克舉其
職攝政京兆郡民安之以是材也居是職也固不待予
之增者然余與公同仕於朝又夙有鄉里之好於是行也
嘉鮑君贈人之義而知柴公為一道之福也故以是贈之

送蔣知縣序

余嘗以為守令之於民非獨勢論之也衣食撫育有親
之愛訓誨策勵有師之教勤以振惰威以挫惡惠以周
匱是故政教之成也事不煩而風俗美民樂其治而不

厭去也挽之而欲留久也思之而不忘而君子亦遂書之簡策傳之後世為長民者之勸豈徒然哉余嘗觀古傳記所謂賢守令者其設施布置非有甚高難行之事其才知亦君子之所可及然後世鮮稱焉者豈果無其人邪彼能盡心此不能盡心焉耳此余所以嘗慨然於此也錢唐蔣公文惠以南豐令丁內艱今年起復改知南康蔣公余同年友也始以才薦知江陰再遷南豐皆有惠政可稱道今茲起復而來也江陰之民過于途者皆

曰吾賢父母也南豐之士仕於朝者曰吾賢令長也噫
是何以致此於人邪蓋其為人疏通而有守敦篤而不
滯通儒術而精吏事達民隱而惠下人所謂卓然盡心
者是宜致此而不難也以江陰南豐之為政如此益知
公之為南康尤有加於前時也余無似忝官於朝聞郡
縣守令之有政績者未嘗不樂道其政而歆艷之況余
同年而交厚也耶故於其去也尤欲其勉而大之心無
愧於古之人也故為之序

送董孟聲序

余始與孟聲同為郡邑博士弟子朝夕相見輒以經史相質問婆娑嬉遊有足樂者後余忝仕於朝孟聲亦以進士官四方不見者久今季夏獲遇於北京握手相勞追論嚮時事多可笑者於是二十有餘年矣向時孟聲容貌白皙為人恂恂和易與人交溫然久而愈可敬慕今叩其學浩然無所不窺察其為人益加於往時遠甚於是吾又甚自愧也歲之八月孟聲復拜建陽校官之

命將治裝而南凡與孟聲游者莫不為建陽士子得師之慶況余又相知之深者耶夫校官位雖不加於州縣之吏其道固甚重也彼州縣之吏苟善其職施不過一州一縣而止耳若夫身而率之正其德論而宣之明其道作而振之成其材譬之深山大谷梗枿杞梓惟用者取焉其效不亦大乎由此觀之則凡為建陽士子者宜何如其慶也抑吾聞建陽當甌越之交密邇崇安劍津其間多名山水幽深遼闊寬閒之地亦有如昔時隱君

子者乎益聲講授之暇倘得其人而與之游吾固不獨為士子慶又將以是為吾益聲慶也益聲行矣他日有得北歸以告我請執鞭而從事焉

送江西右布政使于克恭之任序

古者建侯樹牧以承化宣德阜康兆民肆惟聖朝稽古建官惟賢惟能用列庶位而外牧藩之任尤重於昔永樂十六年四月詔以刑部郎中于公為江西右布政使朝之大夫士暨凡交游莫不為江右得人之慶其行也

祖而送之車馬溢路觀者歎息大丈夫遭遇聖朝致位如是誠可謂不負所志矣然予嘗觀古之君子抱其魁偉卓絕之才欲超出世俗勒名當時昭勛業於天下後世恒患弗遇其時遇其時矣患弗獲用獲用矣患弗重且大重且大矣又患弗克負荷而有瘵職之譏于公早以文學起家振鐸郡庠為良師儒升秩執法為才御史侍講春坊為賢宮僚載遷秋官為能郎中夫為師儒也良斯知所以為教矣為御史也才斯知所以用法矣為宮僚

也賢斯知所以事上矣為郎中也能斯知所以賦政矣
事上恭為教勤用法審賦政均以是出任一面之重卓
然為賢方伯豈虛也哉宜乎命下之日吾鄙之士莫不
彈冠而相慶也昔者申伯出治於謝尹吉甫作詩送之
其詩曰四國于蕃四方于宣又曰申伯之德柔惠且直
以見宣王任賢使能致中興王業之盛著之大雅萬世
誦咏余無似幸忝朝署之末于公斯行仰頌聖天子用
賢之明且欲公流功名於無窮也竊取詩人之義為序

以贈並以致祝望之意焉同邑王洪序

送沈副使秩滿序

錢塘沈均仲聲為北京庫官秩滿將上政於吏部其鄉之仕於朝者前浙江按察僉事劉必榮刑部郎中方果主事朱勤揚勉兵部主事周文監察御史周建中書舍人葉臻錢博朱暉王賓衛經歷祝祐翰林庶吉士潘勤冠帶舉人萬完太學生朱幹扈從來北京喜其為人與之游又樂其政之有成也屬洪為文贈之洪曰君子之

職也盡心焉耳矣昔者孔子為乘田曰牛羊長而已矣
為委吏曰會計當而已矣夫委吏乘田卑吏牛羊會計
細事孔子大聖也以孔子之大聖行卑吏之細事宜若
不數數然者必曰會計當焉牛羊長焉其小者如此況
其大者有不盡心矣乎故曰我戰則克祭則受福後之
君子其不及孔子也益遠矣或仕而卑職則鮮事其事
曰我非是材人亦將曰彼非是材噫洪嘗觀之矣未有
舉千鈞而不能舉儋石者小者之不足大者之有餘天

下無是理也直不能盡其心焉耳政之患莫大於不盡
心盡其心者任大且重雖材不足猶克舉焉不然雖小
且易亦僨焉而已矣洪聞仲聲自授官以來期歲之間
凡金帛泉布百貨器用之出入簿書之會計頗置之方
畧寸較而銖察之曰燥者不可蠹也濕者不可腐也盈
者不可損也人問之則曰無負茲職而已吾非他求也
嗟夫使職如仲聲者皆若是政其有不舉者乎朝廷設
官制祿待天下之賢俊黜陟之明賞罰之公足以砥礪

而懲勸若仲聲之才其有不進而升者乎進而不止勤而益勵洪知其將無不至焉也洪亦與仲聲同里閭今來北京始識於數千里外觀其溫溫謙讓廉敏而勤事宜其克稱其職如此也以仲聲之稱職如此益知洪之罷輟者有不可以不勉也故樂為道之而贈以言

送沈大使之任序

今之遞運使蓋周禮大司徒稍人之職掌州邑車船徒役之數而治其政凡內外賓客往來及財貨之出納於

官者至則督其徒役飭其舟車以待上之所命州邑長吏歲書其勞而殿最之其為任蓋亦重也夫道路轉輸與夫勞來賓客皆三代為政之先務然所以旁達四方輪運輻輳往復萬里若在朝夕亦豈非得其人而然與不然吾見滯而廢事者多矣錢塘沈仲聲氏北京篋庫秩滿擢鄱陽遞運所大使仲聲余友也為人修潔通敏而和謹可喜其為篋庫也夙夜小心綜理詳密日謙謙焉從賢大夫求所以自益者雖位不加崇而休聞益著

今茲往也咸以為仲聲之才有可以至遠且大而沉鬱
若是夫職無大小惟稱之為貴苟稱矣雖小榮也不然
祇益所以為愧耳由是而觀之若仲聲之才其不至於
遠且大者吾未之信也古之君子有自微職而至於華
顯者矣在仲聲闕 吉買舟而南凡與仲

聲游者咸追而餞之闕

故贈之以言

送瓊臺雲君之官交趾序

聖天子受天明命君闕

國提封之廣聲教之大極日

月所出入惟安南盜臣黎季犛懷虐無道罔畏天憲戕
其主竊位毒痛生民以俶擾我南鄙億兆面內並告無
辜聖天子命大將率熊羆之士征鼓橫徂水陸並進霆
震彗掃天兵所至罔不披靡遂敗其徒衆墟其城邑縛
黎氏父子闕下於是立方伯守令一如內制遴選英俊
往蒞其土以撫以輯於是瓊臺雲君以太學生被選往
官其土夫交趾之民苦黎氏久矣今幸出湯火沐浴膏
澤子之往也其可不體上所以止暴撫新之意乎蓋惟

廉則無欲靜則無擾寅而嚴則人愛且畏循良愛惠而悍者不得肆能若是其可謂不負所任使矣雲君竭志好學溫厚而有斷今之行吾知其能有為也為序以送之

送武功某君之吳縣令序

姑蘇為三吳望郡吳縣其壯邑也稻梁絲帛之富足以供京師而轉給於他州其民亦樂於自足力穡工賈有常業吏易以治去年時雨為戾三吳郡縣水今年又水高下沮洳地無所出百姓告病聖天子軫念東南之民

遣一二重臣往撻治之高其隄防遏其橫潰洩其汙塞而東注之海又除其一切繇稅廩其尤貧不能存者既復選賢守令以字之於是武功某君為吳縣焉濱行太學生某徵予言為贈予竊以為民未病易治也既病而未甚亦易治也然不可以不慎譬猶強壯之人一旦有疾良醫者謹而護調之祛其外邪養其正氣則不勞而病去不然則或至於甚而不可救然則君之往其可不慎也時而存之寬而濟之勤而輯之撫摩之衣食之身

歷其艱難延見其父老究其利病而遷就之俾居者不
匱來者如歸泰然不知患之及已此蓋聖天子欽卹之
至意而君所宜行者也果能是吾民其有瘳矣君始以
太學才俊為浙江僉憲仁而有威繼為太平令有惠愛
在民予同官蕭君嘗稱之今之行吾知其能為也故以
是贈之

贈李士文序

世之醫務於高者馳思玄遠議論枝蔓而罕切於用朴

者膠守古人成法而莫知變通是二者皆過也夫人以五臟六腑耳目手足百骸之身或闕

或勞於形或

傷於情性固不能以無疾其強弱虛實表裏寒熱之感不可勝窮也死生之候變於頃刻不可勝測也欲以一


定之法槩之不已難乎又其甚者不權緩急輕重盜已入室方且欲修其房閨壯其門戶揖讓談論而退之噫

其不至傷也蓋亦幸而已矣昔漢文謂張釋之曰卑之

無甚高論恐迂遠之無當於事也蓋藥不必同也期以

中病而已矣政不必泥也期以適治而已矣不然雖談天之行彫龍之奭亦何益於用哉吳郡李士文氏其先世以醫名於郡中至士文益精其業凡農軒岐伯伊尹之書與夫漢唐以來名醫之述作無不究心求極其指趣嘗以為河間得醫之權學者不達或失之過東垣得醫之正學者不達或失之迂以故視人之疾攻補汗下咸求其中振危而起廢既退無矜容無倦色恂恂然言若不出諸口是果有以異於人者矣由是被薦登於太

醫而良醫之名一日隱然聞於京師及扈從來北京而人趨士文者益衆夫京師賢才百藝之所集而士文卓然若此豈虛得也哉今年余友監察御史吳憲章氏得疾甚劇衆醫莫治士文獨能起之顧金帛不足謝也乃求予文以為贈余言何足為輕重哉然予因士文之醫有悟其大者而世之業是術者或因予言有所發也故書以贈之



毅齋集卷五